

四庫全書

集部

欽定四庫全書

集部  
秋澗集卷六十六

詳校官侍讀學士臣沈成熙

侍讀臣孫球覆勘

總校官降調編修臣倉聖脉

校對官編修臣于鼎

謄錄監生臣賀誥

欽定四庫全書

秋澗集卷六十六

元 王暉 撰

箴

憲司箴

肅肅憲司虞夏九牧其在漢唐刺史都督控臨百城靡  
不約束既重其權匪輕所責治弘務簡望隆威赫有臺  
閣清嚴無州郡急迫繡衣四出輜軒金節命服有彰非

爾徒設奉宣詔條巡省按決官之邪正政之得失酌汝  
之言以明黜陟俗之媿惡民之休慝恃汝注措以安以  
息國有重典越惟刑辟園土幽囚肺石寃抑汝審察  
哀矜致恤毫髮或差追悔何及剛不可憚憚則氣怫弱  
不可欺欺則衆忽事無避難避之愈集法毋情破破之  
有窒何以處之必正必式一有私萌力為之克如松斯  
貞如鷲斯擊其嚴秋霜其平砥石是乃所云邦之司直  
我玉無瑕彼疵可錄志行氣伸吏畏民服一適清寧乃

稱所屬其或暗夫大體苛細是燭較利害之孰多至首  
尾之畏蹈甘於慵身計日而祿官謗奚遑顏厚有忸爰  
作斯箴敢告司僕

言箴

語戒過繁論先期用我之樞機寧唯妄動動躁輕易違  
理取勝過慮思邪皆言之病一不知檢有害於性審察  
安詳時然後應非法不言一出於正其或不然自陷於  
穽念之念之

忍箴

忍之為字以刃加心少或弗隱其傷必深家府維訓挺  
挺而全謂予平生半在官聯萬變前陳履薄臨淵少觸  
與競其心即然自救弗暇理何有焉量汝之性以忍為  
先惟忍則濟欽哉聖言

銘

楷杖銘

并引

孔林之木壞異者為多魯人世不知其名者蓋夫子

沒弟子各持其方之木來樹焉在枌枌龜檀中名殊  
顯者獨文楷耳前朝斲之板持以備新進之儀豈思  
其人重其文敬其手植之意也歟紫陽公攜二杖過  
衛一以贈予因識其楷之所以為楷也如是吁昔而  
簡今而杖用雖不同至於重其文敬其手植之意一  
也銘曰

體堅而微色正則瑩庚庚其文挺挺其性本根傳萬世  
之芳枝葉蔭百王之聖斲而杖之以扶吾道之衰兮庶

由乎義路之正且予年之方盛是不可施於其鄉兮復  
將斃蛇妖於異日于以叩原壤之脛惟桑與梓必恭且  
敬矧吾家之草木敢不同甘棠而加愛兮故賡之以舞  
雩之詠

檳榔杖銘

體堅而柔節促而澤赤藤桃竹非所狎兮青蛇奮螫腹  
紋鱗鱗入手滑兮質挺炎德出入有聲豈特鏗爪甲兮  
堂堂許公國喉舌兮杖而登朝表孤節兮是將代太尉



之笏擊奸慝於未孽也

芝枕銘

并引

予觀神農氏之經芝之種有五馬紅者如珊瑚青者如翠羽黃者如紫金白者如截肪黑者如澤漆皆尤明洞徹如冰之堅五岳之山產焉後之以芝名者率若是豈柳柳州所謂天澤餘潤雖枯枿敗腐猶能幻出芝菌以為瑞物是枕之芝或間產名山或蒸出枯枿予不得而知也但不斤不斷底平面傾犀文外繞

疊成枕形誠可以薦牀第而承幽人之憇息也銘曰  
體似重而輕性似柔而剛豈顛木之餘枿薦幽人之野  
牀質似芝而秀文似犀而光果齋房之瑞氣化竒形而  
不忘但髣髴兮一枕之妙至於為芝為菌吾不知其物  
化之常秀比連萐清凝寢香枕或強名用適則良俾歌  
之藉之勿邪其所思兮是可以夢周公而接羲皇也

砥柱銘

水之為力無物不從津門之險壯夫砥之為雄洪濤西

來萬夫前攻而戰而薄我當其衝狂瀾勢倒安流而東  
屹高華之隆崇也吾儕小人弱植淺中衰俗外誘羣邪  
內訌苟內省而不疚有破心而直吾躬也

金銀沙二泉銘

山之清潤澤氣以通兮坤之靈秀醴泉以發兮太行蟠  
巨元陽所輒兮天門左界二泉並罕出兮巨鼇背鑿寶  
藏泄兮靈淵滌滄海眼徹兮泓澄一碧金瓊屑兮金流  
石爍奕永雪兮雲煙藉潤為改色兮酌而瀹茗甘冷冽

兮挹之薦帝明水潔兮淋漓膏液補天缺兮女媧鍊石  
用不竭兮夸娥弛擔濯困暘兮七賢尋盟沈醉達兮幽  
響傳谷鏘瓊玦兮山空月落仙人揭兮闕  
生肥悟真  
訣兮我銘勒石泉不涸兮

端石硯銘

硯之同功甲與鋌試之敵場惟利堅其或不爾安用焉  
嗚呼此硯穹而圓神龜足跼舌有泉既利我穎墨且便  
青州絳州何所賢題品入格因公權處士或託斯銘傳

默齋銘

語寂滅者涉於絕類談自然者入於虛無嗚呼默乎其  
天地閉賢人隱括囊无咎无譽者與至於明良相遇治  
具畢張一言而可以興除者如宣父夾谷之盟孔明隆  
中之論茲吾儒之事也豈得退藏於默乎豈得退藏於  
默乎

閑邪齋銘

噫嘻是心既安而放內關外膠靡不馳嚮忘返從流于

馬板蕩維禮與義以戒以懼存之以誠為閑之具有人  
于斯言動聽視庸信庸謹造次於是成德雖中慮萌邪  
侈一念或非為奸所餌易演文言閑之義宣一聖精心  
權輿於乾譬海乘載一碇能安如馬泛駕受羈則旋險  
去而夷浪平斯淵彼碇與勒曷能舍旃何似李侯周防  
未然操心知要惕馬拳拳言信行謹其殆庶幾一誠存  
中太山可移素志不昧聖賢同歸

洮石硯銘

吁爾洮水中吐翠欲流礪於砥考之譜端歛齒波及余  
古月子斷而泓堅澤玳孰為尸王御史

毒瑁龜洗銘

盤月槃漢洗器制爾形從相類漢維魚我龜貴取彼壽  
縮元氣宜子孫傳後裔銘者誰王子系

訥齋銘

堪輿兩間事變靡極成始要終非言莫立玄聖垂教訥  
言為先匪曰終默時然後言喋喋利口返為事愆覆邦

亂家身溺于淵猗嗟鄙君內思靖額一訥銘齋浩浩其  
天人亡道存實大其傳尚來者而恪守猶丹書與湯盤  
也

文貞公笏銘呈竇學士

公家物

唐有天下垂三百年於桀者貞觀之治焉其效蓋仁義  
之一言世之望公三辰在天是則公之德何俟笏而賢  
耶銘存物亡實大其傳則是樵之文伊笏之曾玄也猗  
歟竇公國老之元神物有歸竇之几筵安知無望壠而



求後因甘棠而思仰伯於燕者耶

仙臺金跡硯銘為宋少卿弘道作

盤盤嘯臺一碧千尺湛月露以洗空隱松風之蕭瑟仙  
游何之留此真跡斲而硯之是將晦靈蹤於翕歛藉玄  
雲而掩抑神物有歸蘭臺之客會登玉清蕩空碧斗挹  
滄溟醉憑鼇極拂海苔之霞牋揮仙火之巨筆也

楮都護銘

漢開西域國三十六中置都護控制約束強凌弱折迺

有攸屬我嗜羣經視為席珍繡閣不時未免綵芬亦作  
護府仰茲楮君統之有要無相奪倫侵損日遠緝熙日  
新挿架安書曰史曰墳勒銘于上策燕然勛

太湖峯銘

丁生贈余湖峯一株頂足背面蒼鱗隱隱渾然天成  
無微竇可隙植立几案間殆與頎頎君子相對殊可  
翫也昔元春陵作榱溪杯樽等銘命名既異垂戒又  
深予嘗讀而愛之因銘茲石仍掇其義

片石何狀天然自若鱗鱗蒼窩背露蛟鱗一氣渾淪略  
無巖壑太湖凝精示我以朴我思古人真風眇邈變詐  
百出孰知誠確心深洞府混沌六鑿剛健篤實君子之  
質惟其似之是用比德嗚呼安得誠天下之意如茲石  
之挺特也

書厨銘

至元十七年八月三日夜與子孺燈下觀丹書銘因  
擬而作此

置之於室胡若載之腹也名汝曰厨以其無不蓄也腹  
至於餒返為汝所怛也子其戒之惟勗

鸚鵡啄金桃研銘

大名劉總尹求予作忍  
濟堂銘奉此研見謝

翠鸚啄桃翩欲飛去棲影片泚以慧之故芸閣風簾疑  
若與晤助彩毫端辯夫詞語槌黃鶴而倒芳洲賡正平  
之賦邪復明辟而以夢諫草梁公之疏也

菊井銘

余到官兩月移居司西官舍治舊井而新之方衆菊

爛然擇其佳者植諸欄傍因銘之曰菊井其辭曰  
養而不窮者井之德也服而能壽者菊之靈也我潔斯  
井罔羸其餅彼窈然而深泓然而澄蓋南山之餘溢迺  
濟清而未名思欲沉浸醲郁皆菊之馨庶幾西河南陽  
之意仁吾民而制頽齡也

冬藏圖右銘

太極中分有靜有動氣與理錯未免交闕孰盡聖哲不  
思而中思而或邪奚翅荒縱理明伊何精一為重閑邪

存誠發而可衷內莊全體外致吾用旦也奚思尹則孰  
覺一洗妄心盡易前錯學孔之學樂顏之樂華去實存  
玉礮石斲道最中害或輟或作不學而衰即成枯落念  
至于茲立敢不卓靳惜分陰守之以恪敬入為門補我  
不足足豈三餘日新一日動靜云為是為之則敢告靈  
臺服之無數

左箴其目曰定力以固窮為冬藏圖作

天運循環有泰有否人生其間迺一氣類乏財曰困弗

通為塞苟遇不安習坎而阨自昔君子器藏俟時出門  
有礙吾將安之仲由愠見阮籍窮哭惟昧困理于艱于  
疏安之有道說不徒泛堅我定力不容少濫氣養以剛  
志明由澹少馬墮昏亟為澄湛衣敝服緼一溫而止飯  
糗茹蔬一飽而已茫茫厄臺悠悠羹里文明為夷孔玉  
積毀聖賢猶然况弗至此我道未亨克念終始

敬義齋銘

維天生民卑之者全氣有澄淳因之以偏惟聖立極俾

復其天因而弗學民斯為下甘彼額蒙時有不暇間有  
知悔或窺厥竅遺緒茫茫又昧其要大哉文言聖學之  
宗致力兼補蒙而聖功一敬內主義須外克凡百君子  
有云有為行而宜之心宰物隨祗直而莊匪方於動事  
物之來未免變闕惟其夾持務成德尊既銘吾心復書  
我紳始終是則日新又新

垂龍圖銘

所翁姓陳氏福州人嗜飲恬於仕宦善圖龍見知於



宋理宗嘗以商舶越海與真童遇自是盡其情狀其  
作也必乘醉潑墨為之天機所到非學而能殆邈棚  
之巽墨法云

醉墨翻雲族聚所翁圖童與真遇黑風吹海作太陰大  
火出山雷奮豫是將執雨機而飛天儘滂沱而洗吳楚

宿雲軒銘

并序

吾友中丞王君買宅蘇門得竒石一峯厥狀如雲靄  
然輝煥於庭戶間甚可愛也因名其軒曰宿雲徵文

於余乃以是文表之其辭曰

瞻此峯雲態度容與觸石而生與石為伍宛彼南山宿  
我庭宇主人名軒其義安取是將停靄靄之容為思友  
之故邪伴東山之卧抱濟時之雨也雲兮雲兮出兩者  
之間固無心兮其從童也須以時兮吾豈欲度之以自  
潔徒為怡悅而已邪

水晶筆格銘

玉瑩冰清太陽之精孰琢肖山之形鎮我几案虛白夜

生息我予稍摩壘之聲空明洞徹爛氷峯之孤撐物有  
形似吁足可驚若倚之而固寵旭日已升恐潰釋而推  
崩也

頤軒銘

為洪同簽作

堪輿兩間物所充兮而長而養一氣融兮人惟法天浩  
馬同兮頤以象觀四陰內訂惟養之以中正不我舍而  
彼從是以得終吉而在躬洪公孕秀海山沉雄其材足  
以經制其量足以含弘贊翊樞務既貞且忠故謀謨應

事機之會談笑折尊俎之衝不恃全美方致養以為功  
果我枵腹以正以中虎耽其視而始而終見寒思煦恐  
邊衣之未備寸膚失養念一士之或瘡扁吾軒而匪外  
飾起居飲食在日用常行之中吾將養已以及物致事  
業於無窮是知大易迺萬世之龜鑑尚何俟授一編於  
圮上之翁也

愛菊堂銘

草木之品色中氣清有隱逸之稱唯菊為能含精益齡

晚而芳馨又類夫君子退讓而不爭圮橋老仙友而堂  
名雖墮履之弗進亦足以卜幽人之永貞華構傳芳三  
世相仍其孺慕也孝凝然心深而愛中樂不勝口欲言  
而不能自鳴者此郭氏之所以尋盟也若夫平泉草木  
固護封植亦克厥承是或一道終未極愛之之至情親  
存親沒觀志視行曰如其道終身是程嗚呼郭君至性  
愉色豈得於尹氏者拳拳而服膺吾今取為銘以告草  
堂之靈安知不入戶聞愾然之聲也邪

虹霓硯銘 并序

趙太博彥伯出示紫石大方硯請銘余以石有奇雲  
類虹霓然因以字之銘曰

蒼梧雲蒸九疑溼碧海風濤翻出日江山通秀鬱紫煙  
產此珍材比玉德金繩繞腹泄精英電激神光掣蛟室  
雌霓斷影飲丹池暮雨連蜷一千尺甃泥鄴瓦稱善墨  
石中乃有此奇質子墨客卿尤所惜大率縱橫供夢筆  
左招協律揖孫通出入英莖五音飭

楊氏雕玉寶章銘

并序

故參政楊公之子勗家藏漢雕玉印章二方者丞相吉  
圓者太尉震也其博陽章即乃祖息軒所傳故物大定  
十二年崔憲可詩序云長安許惟寧以是傳秘自米家  
船入手摩挲三嘆息趙君文彩珊瑚鉤禮樂監畫于闐  
花驄圖得之嗚呼二公以通明正直師表兩漢今去千  
餘載其風烈凜然思其人而不得覩物增慨乃為作銘  
士桓博雅好古今為集賢直學士庶幾能紹其家風者

漢丞相博陽侯丙吉印銘

吁寶章纔寸許紐玄龜縮漢組隸為刻見邈祖神物護  
照千古此何夕得摩汝恍坐我丞相府初望氣郡邸圖  
詔夜殲拒戶樞是雖天公可無偃抑興將舊圖乳祿恩  
其可孤獄有牘秘不舒是章緘金滕如歸有數子與俱  
什襲藏无太踰防有光夜衝閭六丁取媿貞符在博陽  
宜特書

漢太尉司徒楊震印銘



伊弘農漢巨儒道自任聖為徒主鱣堂閱羣書表氏諱  
茲為符位台鼎綰國樞赫漢炎走羣羆堂堂氣忠義軀  
四知金屬貪夫殆是章玉不渝內寵橫哲人殂與雀環  
瘞幽墟見白日歸子裕世失系紛莫區伊莘楊豈公莘  
苟不爾胡為乎致大鳥止丘隅淚如雨洗冤誣佩之行  
可舍諸我作銘此嘻噓

張指揮甘白堂銘

我識先帥于清之野緩帶輕裘投壺歌雅伊時張君侍

立親傍虎豹在穴已炳其章及將羽林肯構其堂榜以  
甘白于先有光試嘗聽其言論諒天姿之殊常是將調  
和衆味羹傳鼎之美邪彰施五彩締上公之裳邪噫吾  
說已竟必一居於此恐德業之未易量也

忍濟齋銘

改作為楊子英題

多變而莫測者事機淺深殊跡而難度者人心善惡我  
據事會忤激交作彼以機成客氣外鑠或當懲而乃忿  
可理遣而反愕隘不自容事安能若因小端而致大亂

又奚翅九州之鐵而鑄一錯也理貴含弘量崇溥落功  
若與即是心先忤言不可出我舌為辭故堅伺拒門者  
收康濟之功俛出勝下者辦戡定之畧宜成王之戒君  
陳見周書之噩噩

海印奎星研銘

宋祕監弘道索賦詩被東宮旨編節世宗實錄

奎麗空文之宗秀孕石與歛逢礪而研以類從海有瀾  
穹浮蓋印天光終古在拱前星問有待靈玄雲集毫彩

酌前言作帝誠

歙石壁研銘

并序

至元癸未歲正月二日謁左山先生坐間出茲硯示  
客僕以形質異常略狀教語公喜甚曰汝言殊有契  
予心者吾子其為我銘之銘曰

玉德而金聲穀紋而紂理湛兮虛見明生於旁魄恍兮  
惚疑璧投於山鬼玄雲橫馭風生燕几顯諸用起經綸  
於心上發餘輝綰秋蛇於筆底是則公事業之美也我

將靜濯碧空洞徹表裏觀春雨之散絲似商霖之復起也

醉仙石銘

為韓通甫作

爬沙慕綠蹠蹠鼈跛化而醉仙蓬首不裹傾歌落魄對  
客程裸惟不適用得脫秦火黠桂樹之秋香普故宮之  
青鎖推墮人間無可不可頑碧凝蒼肩袖垂鞞留賓筵  
而盡餘歡每蹲蹲而舞我也

殷乳鼎銘

并序

韓生弘以瓦鼎示予制極古而可愛余曰此從何而  
得曰得之於帝辛之故墟然不知其為何制也余曰  
此殷之乳鼎也即為之銘曰

惟殷墟廢已久代所居止野叟歿而葬此何有其為物  
故商埴千年後見白日乳至四宜蟄蟄萬有生皆此出  
取為形穀瑒璧媿龍觚飲而食秋澗銘渾沌鑿韓生藏  
深夜壑後來者見必作

贊

老人星贊

月帔雲衣金支翠旂御星駢而凌沆瀣騰淵耀而表明  
時爛祥光於萬丈湛南海之清輝我見我出為瑞為禧  
厯朱方而朝北極祝皇壽之無期何南山之鞏固等曼  
天而峻齊然後廓壽域兮無際挈斯民而溥躋倚蓋霏  
霏蒼茫曷歸貝闕珠宮羣仙與嬉歌東皇而遠引隨升  
降而入氣機但天容海色渺不可以涯涘兮眩朝日之

重暉

先君思淵子畫像贊

德之厚其所受也全學之博其所守也專游刃恢恢利  
周物先占氣斗間世之龍泉卒之臨大事以益辨曾何  
以惠文而為賢望之儼然即之溫然治之隆污持衡以  
權一言吏師世真可痊孰謂神而化之之妙託丹青而  
可傳耶

王內翰寫真贊

總管蕭君出示承旨內翰寫真木庵師題贊其上似



有所未盡者因為之贊云

充氣之粹兮與材無忤靈襟之廓兮以道為腴延譽在  
龍門之上視草冠玉堂之廬其及物則見百里之寄其  
託輔則可六尺之孤天步改玉婆婆兩都悵蒼蒼之秋  
色鬱喬松而未枯尚能賓扶桑之出日振人文於燼餘  
見之丹青清風穆如人徒知百年之遺老我以謂中朝  
之鉅儒彼睟然而容盎然而春見於眉睫之間者固非  
山澤之臞也耶

鮮于純叔寫真贊

遙遙華胄世藹令聞沈水之集其源濟淪老成雖遠而  
典刑今見于斯人髯踈而秀心吉而仁藤白而冠紗烏  
其中豈見夫身外之身予但知仁者之必壽其風姿落  
落百歲猶畫中之真也

麟叵贊

喻羸叵脹豕腹背負厥角挺竒骨列泰階職盟滌今歸  
于我研與匹薊門市南冬日得滄溟之波浩無極挹彼

注茲泚我筆茲耕誅絕旌直德子孫寶傳金玉式

桑泉老人畫像贊

德與學專行為世傳是之謂有年雙瞳炯然蒼髯戟然  
人目曰山澤之仙庸鉅知抱長孺之直甘骯髒於門邊  
者耶

范文正公畫像贊

堂堂范公三代之佐致君澤民盡夫在我曰義與仁經  
綸之具篤信力行曾不易慮受知裕陵千載一遇其施

幾何貞我百度狷狷言激公而去天下之事匪材莫  
為遭時富材中靳固之治止斯耶由數竒耶再拜公像  
涕洟咨嗟

乖崖公真贊

堂堂益州元精之傑用智馭權以氣達節在德克剛得  
吏之訣其揀時也若乖崖而極經綸其擿姦也不鉤距  
而洞窟穴噫太華之雲清淮之月豈無閒心大厦火熱  
較以出處此兼善而彼獨潔宜公平生日新事業皂裘

褐衣有將之威我拜公像清風凜而悠悠九原愛莫起  
之

呂仙翁真贄金道陵祕府物今為王簽省家藏  
元精貫中老不息先生煉形與之一氣機出入我所乘  
世間甲子管不得有時變現稱劍客三江五湖風袖碧  
江雲紅爛岳陽樓醉飛星馭鞭金虯騎驢欵上長安道  
來看西風渭水秋古人事業垂不朽八表神游欲誰友  
乾坤况復一洪爐萬古消沉竟何有先生遺照滿人間

已是真詮不死傳只須袖裏青蛇氣夜夜人驚在斗邊

駁華駝圖贊

并序

馬之有駁猶人表之異常也昔骨利幹貢馬百匹中有駁者太宗愛之親為製名曰決波駟又秦胡公有乘馬號忽雷駁此馬毛質特異豈骨利之遺種歟故供奉官圖形以獻見方物一嘗之盛云

吁神駟骨相殊振蒼雲散華軀供帝閑馭虬鬚歷八極塊清都非所覲三品芻有物制噤不舒絡青絲伍髻奴

終奮鬣躍天衢君無癡茲畫圖

填星神像贊

坤元之精積而上曜厚載之德至靜而妙爛然黃明有  
歲之兆僧繇像之其神杳杳冠著牛首類其順也手縮  
方玦取乎填也非夫知鬼神之情狀者何以測其奧隱  
也

二十四大儒贊

并序

堯舜之道得孔子而後明六經之旨俟諸子而後發

逮秦火燔蕩先王之迹一向熄滅而天理之在人心者何嘗有一息之間斷哉漢興諸儒挺出如董生劉向孔安國毛萇楊雄號稱鴻碩斯皆摘奎之光發輝孔壁探聖之幾取訂口傳致興學立官文風彬彬可謂盛矣然六經之旨有師授而無傳著東漢已來師說並行馬鄭賈何服虔王肅之流網羅衆說正誤刊繁流藻箋注復使聖道粲然如大明當空蔑不耿昭以之斷國論建民極有不可斯須離者至唐踵七代



之衰理雜文弊道統益微及韓愈氏出以道濟自任  
隄障未流廓清義路蓋皇皇如也故大儒位置終之  
以昌黎伯者良以此歟若夫

闕三才彌綸元化

前世比

闕

圖像列配神庭

闕

為不刊之

闕

至元癸未冬十月齊府廟宮兩廡繪事告成

闕

明靈儼然如在爰作贊文昭揭於上庶幾乾端坤  
倪軒豁呈露聳齊人之敬為邦家之光也

左丘明

麟經垂憲百王是懋素臣筆傳日星益明文開史統世  
咀華英儷景同翻永播休聲

穀梁赤

封襲丘伯

聖道羣用見有深淺赤也明經辭清義婉漢儒推較大  
開學館繼我國政論益光顯

公羊高

封臨淄伯

麟出魯却筆終史削公一再傳若聆徇鐸宜其資深裁  
辯辭諤折衷羣疑匪斯孰託

荀卿

封蘭陵伯

金聲絕響詭辯縱橫蘭陵著書吐辭為經憤彼譎變欺世迷民性惡之說有激而云

伏勝

封乘氏伯

秦火驪坑儒厄斯極天不沒公俾副孔壁渾灞之義垂範後王賴公口授帝道復光照耀齊國文奎煌煌

毛萇

封樂壽伯

風雅三百一歸無邪絃歌音眇孰為傳耶温温樂壽漢

初名家訓傳首出遂正而葩敦厚之風永煽幽遐

高堂生漢博士

封萊蕪伯

秦尚法制禮喪無幾雖雖堂生當炎之始議定官儀國  
容有願會并澤宮赤舄几几

孔安國

封曲阜伯

書出漢初壁傳口授古隸未分詎免訛漏天開聖孫以  
傳以定帝制復明翼我國政

戴勝

封楚丘伯

曲臺傳經有干其儀戴君發揮其詳可知履之則貴悖  
馬來遠煌煌天序相我民彛

劉向

封彭  
城伯

彬彬中壘帝胃惟英授經草諫力扶漢傾已志伊鬱聖  
學崇明驚冕玄端山立神庭

揚雄

封成  
都伯

有漢鴻儒述作之賢體易之妙衍夫太玄映聖之心繼  
成法言大醇小疵其然豈然惟寂惟寞天祿之闕出處

兩間其何以忤

何休

封任城伯

高也傳經心深而文秦漢而下莫闕其門任城解詁堅守如墨開戶免脫破碎陣敵駸我漢事會歸其極

鄭衆

封中牟伯

喧啾梁門師也威鳳志棲阿閣學明三統皇皇使華漢鼎取重諒夫通材中藏大用

馬融

封扶風伯

扶風氣豪博精羣集賢如鄭賈執經在席暢我休風彬  
彬文質尚想絃歌漢南之國

盧植

封良鄉伯

海山沉雄精貫斗極篤生大儒文武之特以道事君以  
經翼國劔佩赫然氣掩羣慝

鄭玄

封高容伯

秦燭六經天理曾熄漢興諸儒臆說雜出司均網羅刊  
繁正誤箋注皇皇沉藻終古

服虔

封榮  
陽伯

卓越九江清介不羣雅材文論為世所珍任城巨敵左  
氏忠臣光造漢彥蔚乎其聞

賈逵

封岐  
陽伯

偉哉侍中好問而博通明四經大肆厥作網維國論張  
皇帝學東觀石渠光寵於爍

杜子春

封維  
氏伯

周官大典興王之迹制古辭約我解我釋入海穿深薄



霄透碧品物詳明千載是式

范甯

封新野伯

藻發儒林學淹墳籍嫉世浮虛著論詣實盤盤學臺膠  
庠大開至今豫章有來羣材

杜預晉大將軍開府儀同三司當陽侯贈司徒  
堂堂征南經制晉室衽席金革研精麟筆學方武庫世  
號經癖有開後來理順永釋繫公存歿憶恍靈氣我曰  
猶龍焉取虺異

王肅魏衛大將軍太常蘭陵侯贈司空

猗歟子雍英發妙年書易陽秋傳列學官制刊朝典秩  
煥郊壇汪汪東海載觀其瀾

王弼字輔嗣魏尚書郎

封偃  
師伯

龍出河圖經成三聖輔嗣窮幽乾旋坤靜漢說多門唯  
公取正伊洛淵源流光與盛

韓愈字退之唐吏部侍郎

封昌  
黎伯

維天有文公材命世擴義滂仁黜邪闢異世溺方深力

以道濟百折彌堅死而後已倒影滅沒貌不可企

文中子贊

顯允文中希聖之徒闡教河汾宛然泗沂斤斤隨文不足與事挾策歸來心醉經史曰魏曰房曰杜曰李學傳聖心有樂有禮貞觀至治有三代風論夫源委先生之功千古而下與唐比隆

鍾氏先世畫像贊

為鄉人  
大明作

顯允鍾公肇跡自秦金季家衛以財發身闡樓丹圃照

映河濱優游卒歲壽開八旬維嗣強矯結髮從軍奮提  
干將屢收戰勲釣臺雪潰死節酬恩伊恕之父蛇化其  
文憤志讀書行比鄉鄰陳力漕府克公克勤是知善繼  
述者豈無其因不過積德與崇仁故培之厚者其發茂  
浚之深者其流濟嗚呼鍾氏之子孫能不封植其本根  
也

趙曹州畫像贊

宓子罕單鳴琴在堂琅琅玉音齊魯之鄉流清芬於異

代得趙公之循良我冠惠文貯書撐腸不竊榮而易素  
守曾格物而恃己長貳政兩州治績章章字民折獄仁  
恕內將體春陽而休燠孰如秋荼之繁張觀兩漢之卿  
相自卒史而翱翔以材以術公其可方固沉底於下位  
浩淵流兮未央維嗣善繼秉駉奮驥慶之所鍾于馬厚  
儻匪槐棘而就列將禮文之有光又何啻簪白筆而飛  
簡華之霜也

九公子畫像贊

史開府子名禧喜莊列學屢為萬夫長有時麻衣草履以散仙自號

銳目豐頤氣貌魁竒被褐懷寶有儼其儀出紈綺之間無豪貴之習抱夷惠之志蔚熊豹之姿齊物我於一致感盛衰之無時其或戴遠游之冠甘元氣之委騎將軍之馬掃干將之霓歛生臯比玄談四馳提筆揮灑以遨以嬉斂凌雲之劍氣等尺鷃而蓬飛恥以藝進與時推移希達人之大觀每先事於幾微與其身之外樂何若

心之內怡是則散之為僊見於丹青者如是又何計騰  
寓說而橫氣機也試將須而為問恐吾言之庶幾

漢諫議大夫王章博士朱雲贊

并序

孝成之朝劔履間健者猶百位然挺身為國直言忠  
諫者誰歟孟當時皇綱紐弛威福柄移亦伏陰凝堅  
冰日至獨能痛國統之將微憤中外之單弱毅然與  
天子合謀厲具臣矯朝曲以社稷大計為言有殺身  
以成其仁者在漢二百餘載之間唯仲卿與朱游二

人而已何忠直剛果之氣寥寥如是哉論者方以不  
量輕重陷於刑戮為譏吾恐為人臣者不以容身保  
祿是耻將何以為訓作諫議大夫王章博士朱雲贊  
其辭曰

天厚之剛百折不撓履霜而冰辨之當早漢至元成國  
統中熄陰掩陽精九廟不食劔履羣卿孰非遠識坐眦  
淪胥權歸外戚厄會中來詎容人力公豈不知言出禍  
入殺身成仁臣子之職彼牛衣言固非所恤諤諤南昌



感公奮激抗書申明路開忠直三復斯言寫我心感  
維皇有師禮自天秩動靜安危以物以則矧惟中材性  
可善惡俟我儀刑狂聖迺作安昌師漢腹心之疾竊我  
崇高容奸隱慝社稷大計莫此為亟雲位下僚自任稷  
契犯顏嬰鱗為漢藥石諫雖弗行彼氣則折攔檻嶙峋  
我舌不結少師劇軀龍逢挺節以分以職於死為說並  
游無慙終古有烈

嚴子陵贊

漢有天下本以霸興陵遲世季其弊莫勝光禹阿臆雄  
歌狂鄙元成以來從風而靡維炎中熾故人作帝先生  
慨傷為漢砥礪潔我一已訓彼四方腹惟可加萬世之  
光幽幽富春渺渺桐江釣絲裹褐終焉倘祥是則柔理  
之道先生助治者其維皇哉噫

漢議郎田疇贊

炎漢淪精羣雄蓬起士昧所擇依強而已附袁臣曹風  
從雲委倖而有成終焉自浼堂堂幽州志在安劉信我

大義掃清國仇先生委質名正言順報以國使力扶衰  
運間闕歸來大事已去君讐未復吾將孰與躬耕故山  
有死無貳白狼之役諒非本志是懲是厲權以濟事何  
以明公龍廬之封繫以千駟祿之萬鍾曾不少睨肯縻  
其躬嗚呼智如荀彧識似田豐明不自保竟貽終凶千  
古而下死魄英風

抵腕贊

并序

郡譙門兩楹下有石獸左曰抵右曰腕為狀特異隱

其齒而吻張崩其角而顛兀頂髮雲委垂卷兩膊世傳殷宮中故物自衛縣移置於此攷之集韻云秉心甚靈蓋忠直獸也彼物爾得氣之偏者也何以識其性之云然以屈軼指佞神羊觸邪麟趾厚而不踐虎雖仁而有威是以忠與直可得而推也其所以表之以為世儀者古人制物有所取而垂戒焉蓋忠者衛上之謂直者不骫之稱此則臣子之所固有而所當為者物能如是可以人而不如獸之云乎作抵牾贊

贊曰

吁竒麗三代制賢其德與獸異體具存神則逝逐比干  
而下遊悲獨夫之狂狷牴兮腕兮無效麟之出非時兮  
使吾拭面而反袂

西溪真贊

秩秩其德晔晔其英天稟之厚固非學之所能用晦而  
明與時偕行愚常與公從事雅量有餘曾不知趙張之  
逢黜豈鷹隼迅擊終不若鸞鳳之和鳴也我贊公像庶

幾典刑道義視文章為重浮雲同富貴而輕至于生也  
順事沒而吾寧疇為丹青可得而名也邪

雪堂普仁真贊

柳州序浩初讀書樂山水有文章父子咸為其道泊  
焉而無求賢於惟印組為務以相軋者遠矣

道行貞純初不絕俗機鋒灑落即之可親苦空任沒膝  
之雪處心探濟物之仁草坐容身雨花繽紛雷音淵默  
獸伏鳥馴咄此圓神澹如凝雲耿金粟之孤影笑人間

之幾塵愛而贊之蓋浩初一流人也

中書左丞許公真贊

古人以道濟為任者時雖見於行藏心不間于微著於  
皇先生道深絜矩以希聖為心律已為度上明君道之  
方下易薄夫之慮危言立朝間者悚懼公于斯時屹傾  
波之砥柱非天下至誠其孰能與瞻拜公像魁然真輔  
奉璋我我其儼而裕至於體用一源先後有叙試以中  
元之治較之見論思與機務念公平生其丹青可得而

喻也耶

醫學教授趙公仲康真贊

洹水流潤太行唯我篤生異人司時之瘥顯允趙公被服委蛇道高而施博脈明而智多世以醫名者衆如公之醫中而不頗護養氣元玉池生波攻以峻劑我禁我呵鬱焉有餘揮之以戈俟其丰衰濟之以和開壽域者五十年良聲番番其所以得于公者如是被之贊歌知陽報之有在福子孫而為那也



王子明傳贊

古人稱殺身易成事難雖然事有大小公私之間如有己私專以公心除天下之害此其成尤為難能而可重唐代宗以萬乘之權羣公卿之謀至取一家奴宛轉畏懦不敢明言竟以盜歸之而觀著之節可謂壯矣

刻栢夏禹像贊

并序

衡岳有怪栢一株世傳夏禹手植長沙温將軍得斯木一枝堅勁苾芬愛仰不已以為神明之物也刻帝

像以奉之亦臣子望舜九疑叫雲蒼梧之義也求潤色於余秋澗王惲稽首而為之贊曰

疊穆神禹玄功格天見之羹墻况手植之所刊帶不下而道存體雖微而儼然所謂斂之管窺浩浩淵淵嗚呼三代吾不得而見之得視斯像固足以揭吾之虔是將同啓石而不朽耶抑以與九疇而共傳也

田仲德先生畫像贊

言論固樞機之先作行在士大夫為重卓越田公二者

錯綜氣無虛談才見實用翔游侯伯之間擬擴香林之  
供幅巾橫策掉首吟諷予嘗聞鄒蒙之辯說有以卜先  
生之定動於戲文獻不足以柯為棟載瞻遺像安得不  
有人物渺然之痛

栢溪主人張仲和真贊

堅以持其心直以養其浩用是二者以全純孝得其時  
而濟斯媿安其貧而取進效其樂也融融為行也慥慥  
氣溫而和貌儼以肖豈惟壽考兮康寧永以為鄉黨後

來之教

趙瓠瓜寫真贊

丹頰秀眉疎髯方頤目朗炯欲曙之星氣吐若垂天之  
蜺畧施為而見底蘊據懷卷而藏器機曩也為平津之  
上客今而乃瓜田之布衣注酒蒲瓠漑此鷓夷醢雞笑  
甕天之舞醉袖拂西山之低趨趨嘯嚙尚肯效夏畦之  
病為浮雲富貴軒冕塗泥况尺鷃享鐘鼓之樂游談到  
六印之累卧元龍之樓下覺許汜未全痴也

耄杖圖贊

先生姓馬氏名天昭字雲翰汾州介休人自號師易  
老人丁丑歲壽八十有一

德維懿其存則不謂之命氣維克其定也能勝乎天故  
衝風之火易熄澆旱之禾有年而况有道君子者焉矯  
矯先生匪曲而全靜以仁樂健為德先應獵無夢絕韋  
有編通而得夷惠之介默而契消長之權何軒冕之可  
累豈山林而後賢氣精而鶴壽松貞而歲堅故得甲子

幾七七之數乾陽符九九之玄道與貌粹峙而停淵儼  
乎若介山之鬱茂濟兮如素汾之淪連方吾道之如線  
賴此老之康延豈造物者卑西河南陽之壽固將為斯  
文無窮之傳也耶

趙徵士畫像贊

君名鉉字仲器多巧思精藝術今年六十有一自號  
鈍軒逸皓所謂隱居求志行義達道者也祖質字景  
道家大興之穴寫里金建春離宮在焉常有詩題學

舍壁間云折脚鐺中烹白薺打頭屋底看青山道陵  
春水過見之為賞識左右以公之名對名見殊加優  
禮仲器公之曾孫也

蒼髯于思雙瞳炯然勁逸鬱幽燕之氣端倪曠太易之  
玄挫止其銳鈍而名軒曾於物而不滯浩宵中之一天  
是謂建春徵士之後其青山秀句猶隱見於眉睫之間  
也

故金滎陽令傅輔之畫像贊

其父霖明昌年間進士行部臨潢沒於王事

玉潔含光蘭幽藹芳孰為氣機貌溫而良我嘗陪公杖屨徜徉冲善為植德之本撫遜厚周身之防見之丹青衣冠堂堂維玉田之傳其故家文物尚髣髴明昌之煌煌若子若孫既行慶以襲吉又將見再世而昌也耶

韓御史畫像贊

晦其明而於物也周以旋介而通其於事也曲以全神湛秋水顏如渥丹藹藹蔚和愉之氣怡怡為孝友之賢



施之有政其達固然同我冠于豸府愛諤節之孤騫所  
可見而知者如是其不可企而得者殆丹青之默然而  
淵也

渡水十六羅漢贊

為聖安  
容老賦

誰吮澹墨作佛事顧頴含光開太始稽首尊者十六相  
金沙灘頭渡淵水魚鼈異獸同一家背負鱗浮供役披  
碧蓮泛艷百花小兩脚何曾踏泥滓法身化現炯孤月  
海風吹墮千江裏補陀巖竇寶香濃滄浪石上觀生死

白毫丸滿海西岸航此洪濤悲一世玉溪老子出示余  
意匠經營親說似禪機已落惓淡中我今試下第二義  
九年面壁度童象一日西歸攜隻履菩提樹下喜相逢  
拍板高歌聊爾耳

香木琴贊

并序

南海石隱禪師合沉檀二木為琴絃而撫之其音克  
諧有不讓於槁梧者段生得之以珍異丐余文以贊  
之其辭曰

繫琴之胎以桐為材製自虞氏其來邈哉斲以香木南海之僧絲而理之有嶧陽之清物逐所好歸之伯寧脫燎爐之融液拉玉雷而為朋藹然雜芬菲之韻琅然泛韶濩之聲嗚呼琴乎學者寡而其將孰聽倘鍾期之與遇又何啻一再行也

劉巨川簽事真贊

事機之勞非材則務弛天質之美逢時則道行於維劉卿志氣逢蠶閱臺閣肇建鶚書應徵豈惟夜書快吏見稱

及佐府幕游刃發矧人奉承而不暇我持難而肆能致  
駕五馬心奚以榮律身束吏明倫恤刑陟而提憲風動  
百城褰帷聳具瞻之美控拳無虛搏之名抵几或迅盤  
根莫勅天或假年蔚為名卿宜大用而乃靳殆收功於  
嗣興卓彼二子力振家聲影纓若綬何天衢亨將見一  
日千里騁駿足而躡雲鵬也

黃落老人畫像贊

猗歟趙公以古為徒燕居磐石定力有餘萬全前陳付

之一壺身心翛然浮雲太虛自號曰黃落散人世指為  
山澤之臞見于序文者如是我說是嘉邈之自如不居  
山林匪樵匪漁安我素分而與道俱醉以酒而適意晦  
其明而內娛壽幾九齡健不杖扶有子有孫簪纓仕遂  
天之報施善人也合若契符甚矣吾衰愛公起予拊卷  
慨嘆遂斂衽而持書

軟背椅贊

并序

昔李山人詔隱衡岳得虬松一枝即形作椅名之曰

隱和終莫能曉其何義故左丞史公之子假予為道  
其安四體養老妙意有不可勝言者繩而網之以軟  
其背把而執之以駕其肘至托承臂臂曲盡其宜甚  
矣工者得老者安之少者懷之之遺意歟名之曰軟  
背且贊之曰

咄此為具其製非一坐促背峻似恭而踏傍無兩把予  
肘安適而最苦者磨隱偃脊未若此君溫柔旖旎譬彼  
姬姜擁抱而息不高不亢老者所仰爰從何來監輿之

狀

管幼安濯足圖贊

天下有二道出與處而已然審時處己有未易言者先生遭三國雲擾蹈海而東高尚其事如度之致禮以加敬丕之遠聘以拜官皆恬然若無所聞所謂隱居求志行義達道者也至於躡傲物表澡洒溪流特一時間適若歆輩俾進履拱杖猶恐自污抗疏代位此何理哉自惟老繆待罪翰林赤日長驅會集寓館背汗浹流暘而

欲踣歛挹清風豈勝愧仰乃再拜稽首而為之贊曰  
吁先生古逸民素所友夷惠倫傲狐瞞東海濱著皂帽  
躡碧漣尚恐染三臺塵若歆輩進履徒破壁手乃敢污  
抗疏請代三孤昧平生何足誅百世下孰知己儵然心  
見終始大起予有蘇子

古燕印贊

并引

參政何公世家易州常於燕丹廢城中耕得圖書小  
印雖百枚制皆殊一日以所得者贈予形如方斗其



文曰韋宙唐昭宗時宰相豈古今人姓名有偶相同者耶入手摩挲甚可惜也作斯贊以答雅厚其辭曰燕有國八百餘維易容爽故都按壁壘見雄圖萬組印雜簪裾人與骨朽已無耕墾間獨得渠一粒小丹砂如其文宙亦盛夫紐岑樓或龜趺纍纍多一皆殊彼斗大黃金塗懸肘後擊賊奴氣雖豪空淪胥三摩挲重嗟吁猗叅相好古徒知澹癖為贈予何所誌遺惠書

四子問孝圖贊

金史卷之六十六  
卷六十六  
天地之經其維曰孝魯人所瞻巨室是效四子致問庶  
幾要道因材為薦聖答各異發藥其偏從容和氣思煽  
皇風永錫厥類怡聲粹色玉佩華裾表之丹青清風穆  
如嗚呼安得一天下之慮宛同是圖

梁太師王彥章畫像贊

堂堂太師勇冠萬夫曾精甲之幾何破南城於一呼三  
日奏捷數果不逾大厦將仆一木可扶衆且願望我誓  
捐軀蒼髯模糊目光炬如戰酣歸來氣鬱犀渠惟孝與

忠同歸異途繫錦囊之三矢與長矛而不殊宜乎文忠  
之筆大書特書不一書而已也吁

劉珍母王氏真贊

嗟嗟母氏恩斯勤斯自期寸草庶答春熙况復身後有  
養何施履霜濡露感懷歲時嗟嗟母氏健幹而慈奉已  
以約保家之肥致家之完乃有今日我食我衣皆母之  
力霽霽停雲泉水湯湯我思母氏何日而忘

重華鼓琴圖贊

幽幽深山玄德聞兮二女薶降媯水春兮乾健坤順其  
道恒且久兮袵衣鼓琴固若我所有兮手揮五絃正始  
此其時兮琅然玉音一氣為之熙兮鏘然和鳴鸞鳳以  
之儀兮衣垂手拱其道本於斯兮升道蒼梧惋莫從兮  
淚浥湘筠思何窮兮噫

故處士牛了齋真贊

眼高一世舌本懸泉噴巋珠璣孰為後先樂育自好以  
全性天生也順受沒吾寧焉彼顏渥而丹野服儵然尚

知為雁門儒將之喬庶幾青山白雲之仙也

故翰林應奉陶珉溪真贊

貌古而氣清言訥而行純此見於外者皆曰儒學之醇  
若夫該貫經史筆幹千鈞玉佩瓊琚大玩斯文足以泛  
珉溪之雪浪追顓軒之絕塵然綸恩甫沾而不祿壽斯  
固於七旬天之報施果何有於善人哉弁朱衣正笏垂  
紳雖未及直玉堂之署尚知為元貞辭翰之臣也

房星贊

粉色黠淡雙絲浮絳冠箕如拄劔緜陽環夜半海氣湧  
火輪欲上鞭金虬赤貌躍入玄闕幽殆侶戰勝塞雲兜  
千金漢將非吾儔中令化筆通神謀冷風拂座寒颼颼

大德四年

臘八日作

房四星為明堂布政之宮亦四輔也下一星上將次  
次將次次相上即上相所以理陰陽正教化南二星  
君位北二星夫人位又為四表中間黃道之所從為  
天衢又為天關南關曰陽環其南曰太陽北關曰陰

環其北曰太陰亦曰天廡亦曰天馬主車駕南星曰  
左驂次左服次右驂又主開闔畜藏之所也

松化石贊

燕城趙考  
清家藏

伊石與松秉彛堅潤雯華根節鱗皴挺勁儼髯童之淵  
潛蛻康溪之深濬伊良震之交感化而為他山之璉逮  
霧巖之玄豹隱錦竈而如技水木清華坤靈藉重氣變  
無方靜含妙用物貴異稱金鏗玉振昔焉不封於秦今  
也罔言於晉但摩挲而三嘆非張華而孰綜然室無滯

而不富况殊方之奇貢嚮為山人隱和之具今作仇池  
怪石之供一線爐熏霽若雲翁栩栩蝶去夢繞神清之  
洞

蛭齋劉先生真贊

先生諱思  
齊燕人

猗歟蛭齋蛭肆螭蟻擴充家傳資深善誘愛波瀾之老  
成宛黼黻之絺繡曾管窺於一編竟韞匱而莫售我瞻  
遺像氣豐而節一官廣文祿才升斗挈簞瓢兮屢空曾  
臧否之何有嗟共盡而奚言豈獨哀於吾友



蛻齋初與胡國瑞同年登第中統初為中書省  
掾後辭歸為彰德路學官卒

秋澗集卷六十六

欽定四庫全書

秋澗集卷六十七

元 王暉 撰

翰林遺藁

增諡睿宗仁聖景襄皇帝玉冊文

臣再拜稽首言伏以至德難名於穆乾坤之大孝思罔極有嚴祖考之稱稽遺美而載揚迺守文之先務弘宣令問茂對耿光伏惟睿宗景襄皇帝秀拔神支淵潛龍

德英武內根於仁孝溫文外表乎謙恭先事而謀臨機  
善斷當軍國撫監之際赫風雲冊伐之功川蜀威加宋  
人為之褫氣鉤臺戰捷金源遂不能兵闚土宇而靖中  
邦翊炎圖而隆寶運策勲天府歸美皇靈方請命於上  
蒼思保安於宗社祥開後聖光啓皇元致今日之隆平  
蓋孫謀之燕翼惟天縱其睿智故澤流於子孫爰伸凝  
慕之誠虔舉增徽之典詢諸輿議允協至公謹遣某官  
某奉玉冊玉寶加上尊諡曰仁聖景襄皇帝廟號睿宗

通守先猷仰聖靈之如在式垂歆鑒降福祉于無疆

追諡先太子冊文

皇帝若曰於戲故皇太子某天姿玉裕茂德淵冲朕紹纂丕圖仰遵太祖聖武皇帝遺訓以爾世嫡元孫譽望攸屬爰從燕邸正位春宮愈貴能謙居貞益慎及夫聽政揆叙有方至於睦親昆仲無間尊師問道日御經筵視膳候安時詢內豎佐予柔理惠彼小民方念神器匪輕投艱有託豈期前星揜耀永隔幽明日居月諸懷思

曷已比者大臣敷奏宜易名奉祀光崇彝典今遣某官  
特冊賜爾諡曰明孝太子永昭遺懿式慰朕懷尚冀明  
靈歆承寵渥

皇太后玉冊文

維至元三十一年歲次甲午五月朔某日嗣皇帝臣妾  
懼帖睦爾謹稽首再拜言洽萬國者莫隆於孝治揚懿  
德者必著其徽稱洪惟我幼冲人嗣無疆大厯服率先  
風化無尚於斯恭惟太母聖善懿恭睿識遠慮力行善

事陰賜及民隆孝敬於先朝軫憂勤於內助宮壺仰其  
規範宗族化其肅雍誕眇躬而底于有成翊燕謀而俾

登大寶深恩至德蕩焉難名匪極鴻

一作  
權

尊曷伸至願

載惟昭考已祔升於宗祧言念宸闈宜大崇其典禮庶  
幾均報仰答恩慈今遣某官謹奉玉冊寶上尊號曰皇  
太后伏惟皇太后殿下端處福宮誕膺顯冊儼母儀於  
四海德配坤元期聖壽於萬年祥開神筭永資慈訓保  
我子孫臣誠歡誠抃稽首再拜謹言

改元詔

朕祇適先猷嗣承丕構訪予落止在夙夜以靡遑永言  
孝思閱歲時而增愴惟春秋之謹始實古今之成規適  
屆履端聿新紀號可改至元三十二年為元貞元年咨  
爾有衆體予至懷

手詔侍郎楊大淵

省表具文朕恪守王封遽膺推戴即位之始不遑康寧  
惟爾遠戍邊陲久服戎政身外心內來陳賀章宜加寵



答之辭以勵忠貞之節故茲詔示想宜知悉

詔罷東平路管民總管兼行軍萬戶嚴忠濟

爾父承國家興運左右將士同心戮力封植東平屹為名藩我祖宗嘉爾父之功乃建為侯自爾嗣位又二十  
年朕初即政命復襲爵往即乃封敬之慎之其脩德砥  
行自立名節勉圖後效無忝先猷十七日戊寅已刻上  
臨軒親諭諸路總尹遂以前東平總管嚴忠濟弟忠範  
為東平總管仍戒之曰兄弟天倫事至於此朕甚憫焉

今予命爾主茲東土非以訟受之也彼所責匪輕敬哉  
今而後苟不克荷非若汝兄可幸免也

投賀某宣諭大理國制

幼懷竒節筮仕昌時及知遇於先朝遂撫綏于大理揚  
威絕域昔收定遠之功服事彤庭屢抗伏波之請宜旌  
前效俾煥綸章汝其宣揚皇猷洋溢方外爰體綏懷之  
意以安遐邇之情轉為招徠式副所託

宣諭大理及哈喇章俾還本土手詔

嘉汝等遠自雲南導從選鋒轉戰千里直渡鄂渚以達  
於此勤已至矣今者俾爾各還本土以遂厥性優賜各  
有差

姜真人手詔

神以知來智以藏往言念長江之邁未嘗一日而忘遐  
想仙標載勤駟傳雍容大厦論用復於細氈寂寞巖扃  
雲暫辭於故隱春寒遣書指不多及

追封皇國舅安濟諾延濟寧王諡忠武制

制曰疏恩異姓無踰王爵之宗追冊元勳况在世姻之懿典禮所逮存亡靡殊故皇國舅安濟諾延天挺英姿志宣忠力當祖宗造基之始為股肱佐命之臣衍慶軒星儷輝宸極惟勛闕之茂著冠戚里以獨高朕紹述丕圖眷懷世德宜錫大邦之號仍褒壹惠之文可進封濟寧王諡曰忠武嗚呼議協明廷庸布絲綸之命澤流後裔永昭泉壤之光尚想英靈歆此寵渥

皇舅濟寧王妃制

制曰爵以德宗既建真王之號婦因夫貴俾隆藩國之儀眷我外家德昭祖母誕彌聖后作配先皇豈惟內助之多光溢徽音之媿是宜管彤韡煒象服委佗顧予冲人獲紹前烈禮崇報本心焉敢忘可追封濟寧王妃與對邦休服茲寵數重行姻親之懿永膺伉儷之榮泉壤雖幽歆承罔昧

贈諡故光祿大夫左丞相都元帥阿珠制

制曰功德兼隆其所及者既遠存亡靡間故為報也必

豐迺眷元勳豈同常品故充祿大夫中書左丞相都元帥阿珠挺英將種作世虎臣爪牙兼信布之材韜畧合孫吳之法惟重厚克膺其委寄故謙恭不有其智能當世祖之恢圖自元戎而宣力奠我南服隱若長城秉持旄鉞者三十餘年出入行陳者百五十戰奮身不顧忠如皎日之明愾敵無前勢若迅雷之擊載揚我武飛渡長江佐收一統之功名出諸將之右繼將明命遠震邊庭威方暢於皇靈訃遽聞於瀚海朕承先猷而祇懼念

王業之艱難鬱爾風雲追惟往昔優加卹典用勸後人  
官資超極品之榮封爵建大國之號於戲麟臺畫像豈  
惟宛轉於丹青甲第賜書庸示昭光於窅窅可特贈開  
府儀同三司太尉并國公諡曰武宣精爽如在不昧欽  
承

太尉并國公夫人某氏制

平章政事布琳濟達母為伯蘇氏父為翼運宗臣嘗有  
功於社稷夫亦折衝名將屢宣力於封疆位陟中台慶

鍾賢嗣惟是數者萃於一身其存歿則俱榮蓋始終之  
鮮儷况內德壺儀之著而婦規母訓之崇錫之以翟芾  
之章賁之以銀黃之飾沛殊恩於既往示深勸於將來  
在邦彛皆所當然於世教其或有補於戲脂田肇啓獨  
垂範於兩宗蘋饋相承尚流芳於百祀可贈并國太夫  
人

追諡司徒鞏公制

制曰節惠易名恩禮備飾終之典依光毓德風雲非一



日之期故具官某稟性淑均處心貞亮春昭考當岐嶷  
之際侍內廷多傳翼之功奉事兩宮勤勞有日爰念卽  
潛之宿望特班邦教之殊階謀叅密近而屢効忠誠位  
極崇高而愈形謙謹朕方升于大寶將圖任于舊人已  
聞歌露之悲可後蓋棺之議鼎湖未遠想陪仙馭之游  
泉壤生光洞賁綸章之寵可贈金紫光祿大夫諡曰忠  
懿有來精爽不昧歆承

追諡賽平章制

制曰人臣罄奉上之忠思卹奚分於今昔國家有飾終之典光揚亦賴於子孫於惟閭閻之家况復風雲之契某官某儀刑西域柱石中朝以文武之長材蘊經綸之大業爰從潛邸早識英資而又圖猷每沃於淵衷度量獨高於天下四川分陝朝廷無西顧之憂六詔行臺郡縣奠南服之理福星霖雨動應時祥和氣嘉聲撫綏殊俗念匪躬而盡瘁每當饋以興哀朕祇奉先猷循思遠節位兼將相德全始終况爾孫支光繩家訓弼予孝治

進貳文昌用推錫類之恩寵以上公之號於戲鑄金圖  
像豈惟專媿於前賢告第頌書尚冀傳芳於來世可贈  
某官某諡英爽不昧其克欽承

賽平章國夫人誥

國治固先於家齊古今匪易婦秩諒從於夫貴典禮攸  
宜某官夫人某氏婉自名家嬪我賢輔備法度而供壺  
職以恭儉而相夫勞委佗儼象服之尊恭懿融管彤之  
美以正以順如山如河主饋宜家綿休積慶夫延登於

鼎祚孫進貳於文昌不以輝稱曷彰內助仍易小君之  
號榮階極品之封於戲德容尚肅於舊儀詰鸞有煥脂  
澤載光於故壠世祚彌昌可封某國太夫人諡某號主  
者施行

追諡故都運梁公通憲先生制

制曰望隴思賢臣子無古今之間顯親盡孝國家有推  
獎之崇矧茲文憲之傳篤我世臣之舊資德大夫中書  
左丞梁溫都爾故曾祖金中奉大夫司農少卿陟早登

科第顯歷仕途履正奉公材優國計持難抗節身為大  
閑在先儒耆德之間有泰和能臣之譽經綸事往道義  
日尊流澤遠及於子孫致位有開於鄉相克宣忠力勤  
相我家不有卹章曷勸來者可賜諡曰通憲先生於戲  
老成雖遠典刑猶見於國人寵數惟新潛德載光於泉  
壤尚期英爽不昧歆承

太子少傅竇公制

傳經明道既輔立太平之基崇德報功烏可後非常之

典故桓傳致臨雍之敬而甘盤動憶舊之思古今雖殊  
典秩不異故翰林侍講學士竇默業尊周孔學際天人  
詢治體以綱常為言論人臣以功利為未侍謀帝幄剴  
切多文貞之風論相中書慷慨見陽城之烈而又三代  
建國明倫是先惟西池儼籥羽之儀故東序擴人文之  
化風移俗易一變虛文地闢天開載明正學迺眷兩朝  
之耆德實為先禰之宮師稽考規模夢寐風采是用榮  
分三事光融邦教之階恩賁九泉瀟洒玉堂之契有來

精爽服我寵靈

夫人賈氏誥辭

天人之際若弗可知禎祥之來各以類應凡祖宗父母  
尊榮壽考未有不以善而致者具官某夫人某氏婉從  
清望嬪我儒宗恭儉以相其夫勤恪以成其子珩璜中  
節藻薦多儀清白傳家管彤有煒宜爾從夫之貴寵膺  
華郡之封鸞誥副加服我休命

追諡賈博囉齊制

負鼎於時既逢其明主當饋起嘆有懷於昔賢某官藩  
却近臣中朝者德適際風雲之會素多監掌之功割烹  
調和迺其常事威儀進退曲盡恒規凡侍殿庭望高德  
度方舊人而圖任遽薤露以興哀歲月雖深德容如在  
抱茂陵之弓劍婉孌何窮悵華屋之几筵未昭勅奠近  
因廷奏大需恩章可加贈某官諡曰某嗚呼授罷數以  
如生幽明罔間顧諸孫之行慶福祉方來慰我老成含  
嘻泉壤



追謚果勒齊制

揚徽內職固有藉於世臣追錫親榮迺式遵於彝典某  
官高閎集慶美行裨身早以謙恭允聯侍從藝則名而  
威則隸責以已而功於人出入禁闈者幾三十年主典  
玉食者何百餘事忠勤奉上夙夜在公每多燕饗之儀  
何止割烹之技方廷章之宣美遽朝露以溘先可贈某  
官某謚嗚呼祗奉仙遊悵同翻於儷景流光泉壤尚垂  
慶於後人魂而有靈歆我寵數

進呈世祖皇帝實錄表

臣某等言臣聞典謨述堯舜之功令名顯著方策布文武之政義問宣昭粵自漢隋及夫唐宋皆有信史以貽後來况大業豐功震今耀古惟深善述首議丕揚臣等誠惶誠懼頓首頓首洪惟世祖皇帝仁孝英明睿謀果斷爰從潛邸有志斯民植根幹而佐理皇綱聘耆德而講明治道始平大理再駕長江過化存神有征無戰迨其龍飛灤水鼎定上都革弊政以惟新擴同仁而一視

規模宏遠朝野清明內則肇建宗祧創設臺省修舉政  
令登崇俊良外則整治師徒申嚴邊將布揚威德柔服  
蠻羌加以聖無不通明靡不燭守之以勤儉朴素養之  
以慈惠雍和收攬權綱綜覈名實賞罰公而不濫號令  
出以惟行萬彙連茹羣雄入彀削平下土統正中邦慕  
義向風聲教奚朔南之豎梯山航海職貢無遐邇之殊  
方且開學校而勸農桑考制度而興禮樂國號體乾坤  
之統書畫煥奎壁之文罄所有而疇戰功不待計而救

民乏聽言擇善明德緩刑斂福錫民遇災知懼得洪範  
惟皇之理過周宣牧政之勤以致時和歲豐民安吏職  
蓋帝德克周于廣運故至公均被以無方可謂文致太  
平武定亂略繼一祖四宗之志兼三皇五帝之功開天  
建極者三十五年立經陳紀者二萬餘事以謙讓弗違  
於備紀故纂修未至於成書欽遇皇帝陛下夤紹貽謀  
厲精圖治亟鑒觀於成憲思適駿於先聲深詔下臣俾  
為實錄宅心宗祏凝孝羹墻開館局而增置官僚勅羣

司而大紬圖籍編摩既富搜訪加詳採摭於時政之編  
參取於起居之注張皇初橐增未見於罕聞承奉綸音  
俾蠲繁而就簡俯殫管見仰體宸衷盡略虛文一存實  
事其饗會征伐文物典章粲焉列三代之英蔚爾開萬  
世之業與夫才德孝廉之士忠良姦佞之臣版圖生齒  
之實繁財賦畜牧之富盛謹依條據粗致無遺今具所  
修成世祖聖德神功文武皇帝實錄二百一十卷事目  
五十四卷聖訓六卷凡二百七十卷謹繕寫為二百七

十秩用黃綾夾複封全隨表上進宸扆臣某等忝備台  
司幸膺盛典顧惟載筆才何有於三長勉進燕辭慮庶  
幾於一得冒瀆聖聰不勝兢惕臣等無任瞻天望聖激  
切屏營之至謹奉表陳進以聞臣等誠惶誠懼頓首頓  
首謹言

元貞元年六月四日開府儀同三司中書右丞相監  
修國史臣等上進

聖壽節賀表

至元十四年丁丑代中省作

伏以龍德御天協千載休明之運星虹沅渚開九秋震  
夙之祥正朔所頒臣民胥慶欽惟陛下長策遠御嚴斷  
有臨凡經制於宏規思光昭於先業修振古未修之典  
集累朝未集之勲獨運神機載揚我武削平六詔無好  
大喜功之心混一三吳見伐罪弔民之舉治道已隆於  
貞觀風聲仍邁於漢室尚深闕政之虞屢欽迂衡之問  
詢謀元老懷保小民體羣臣敬其所尊免賦徭以之固  
本而又禁酒酤而重民食憫兵餘而肆赦恩動順輿情

咸躋壽域繫爾至元之盛德優於行葦之深仁屬節屆

於誕彌適躬臨於巡省臣某等久承鈞軸列侍瑤墀一作

分司蘭省  
阻列莫階

愧無金鑑之封章切效露囊之微悃鳳來儀

而陪舞聽簫韶九奏之音虎拜手而揚休祝天子萬年  
之壽

甲午賀正表

代中  
省作

伏以寅宮建斗洪鈞轉一氣之春漢殿稱觴大禮重三  
朝之慶衣冠環拱文物昭融恭惟皇帝陛下乾健萃精



睿思作聖頓皇綱而開大統備百度而冠前王澤既洽  
於域中威復加於海外中天而立濟世於平以富藏民  
惠免逋懸之賦先春肆赦恩深寬大之書繫至治之惟  
馨香致上天之神祐端臨正旦光動多儀受國籍而膺貢  
珍醮臣工而湛春酒臣某等率先列辟拜舞揚休政與  
時新萬有遂生成之樂壽從天降八秩開億兆之祥

大都城隍廟設醮保祐青詞

伏以天監雖高曾惕顯思之命基圖寅紹敢忘奉若之

誠爰自君臨，願歷年所。顧眇躬之上，託致至理之維。艱  
豈期外侮潛消，復荷天休。滋至炎風，朔雪大開。一統金  
穰玉燭，屢致豐年。而又雲靜祁連，春回沙漠。晝日有平  
安之報，霜風無偃薄之虞。匪涼德之能然，皆聖靈之所  
祐。迺即青陽之月，恭修金籙之科。誥演琅函，真臨玉境。  
導含景蒼精之駕，覆垂雲洪蔭之仁。鑒茲報謝之虔，重  
以保持之福。干戈止息，永惟四海之清。邦國有懷，亦尚

一人之慶

如式

至元三十年崇真宮設醮齋意

大元皇帝紹隆丕構撫御多方欲期中外之安致有憂  
勤之慮爰資道蔭用介福寧擬於今月初三日就大都  
崇真萬壽宮設金籙醮筵二百四十分位消日既良預  
期以告

青詞

伏以纂承有在擴先業以丕隆撫御攸寧皆上天之申  
佑况年齡之向邁資福蔭以彌深念茲一己之微事有

萬幾之重邊聲雖捷軫慮良多精力自如過勤或倦而  
又四氣交更而無不順盤多生感受而未免乖和敢殫  
禱謝之誠普翼神明之相潛消災滯滋至天休素履安  
舒符乾剛而不息皇圖鞏固叢景福以維新無任懇禱  
之至

祀廟樂章

無射宮之曲

昭成

於赫皇祖睿知聰明天扶一德海毓羣生文經武暢治

定功成裡祀無期昭垂誦聲

無射宮之曲

斯寧

天啓深仁須世而昌追惟顯考敢後光揚儀尊謚美禮  
備音鏘皇靈鑒止降釐無彊

祝文第一室

於赫聖武開運立極啓迪後人奄宅萬域繼體守文爰  
及眇質大位昭升陰相之力奉薦明裡載祗載式尚祈  
顧歆永深燕翼

第二室

丕顯睿祖載揚我武左右禰昆耆定區宇慶衍本支紹  
纂基緒嗣服惟初禮須告祀延洪幼冲永錫繁祉

第三室

明明我祖神靈無方武定文綏于先有光運開大統德  
冠百王仙馭漸遠攀慕奚極祔廟奉安縉典是式燕翼  
如在英靈日赫

第四室

於皇昭考神靈在天民受陰賜餘二十年不饗其位眇躬是傳追尊徽號永言奉先爰用昭告齋慄揭虔尚莫申祐寶祚綿延

登明亥元神

維神總劾成功尊臨陰位適承歲德爰誕眇躬屬秋仲之佳辰致嚴禋之非奠仰祈昭格永荷神休

歲星木照星

維神象緯玄穹祥開下土直茲歲事相我沖人恭伸默

禱之虔爰即絳宮之閔庶憑陰祐聿底丕平

柳宿胎星

維神光臨初度獲纂鴻圖顧惟涼薄之躬萃集簡穰之福近因多故致祭幽壇尚冀精英更隆安吉

新船落至祭歲君文

成舟委波謂之落至維神灼知一歲之事況彼中河轉致厥載上下安輸惟神是賴

修五門前橋祭歲君地祇文



應門將將前臨天津玉輅所馳虹梁必陳爰構爰締築  
之曠曠神維垂祐迄于有成

五方帝祭文

因方殊號尊以帝稱殿臨五部有赫其靈維橋之作鞭  
石駕梁尚冀擁衛大來百祥

擬禁酒詔

漢賜大酺歲有常數周申文誥飲戒無彞况康粟者莫  
甚於斯崇飲者刑則無赦近緣春早朝議上陳宜禁市

酤以豐民食朕詳思來奏實為腴民可自今年某月日  
民間毋得醞造酒醴致天物暴殄重傷時和其或違者  
國有嚴典悔其可追故茲詔示想宜知悉

中書省牒宋三省文

中書省劄該爰自聖上即位之初重惜南北生靈之故  
一視同仁首主和議故遣信使講信修睦往年征進大  
軍即令各還本屯仍嚴勅邊將非奉上命毋得妄動行  
人御命以來載更歲律寂寂無來音何哉不惟有失告辭

反起邊釁以致攻圍我上蔡侵軼我鄧鄙襲華陽擾隨  
州劫掠真陽數犯連水此皆出於使軫已入彼疆之後  
將和而戰得無異議乎夫信與義自古所恃以為國者  
也一旦棄捐自有任其責者矣向也大駕巡狩北庭以  
平內難今巨魁授首已於正月廿六日還宮飲至頃因  
行臺入覲陛見之日具以奏聞請重兵壓境以問其故  
五月初五日奉聖旨比一事發端在我姑待之省府仰  
體聖上仁慈尚存兼愛恐啼初心弗允所請且夫朝廷

大計已定此特有司之事耳今就委本路發司詳問馬  
若復遲疑不決秋高馬肥至時別有區處當司依奉省  
劄令差諮議官崔明道兵馬副都李合義充詳問使移  
文淮東副使即今國使安在何稽留不發并節次侵疆  
之役具由回示以憑呈省施行請早示定議據此須至  
牒者

順德府大開元寺重建晉門塔碑銘

國家以神武戡定區夏際海內外悉主悉臣其所以尊

顯釋教彌綸元化者方往昔為最重于以推弘濟之深  
仁斂無量之洪福續大寶錫羣生躋六合於仁壽極樂  
之域豈特崇奉而已哉順德府大開元寺爰自聖天子  
潛邸迄於御極持護寵錫者前後非一至精藍淨衆特  
命近臣主領不與他寺比三十年間續光起廢集于大  
成主僧崇嚴以寺之大緣實肇基寶塔今雖雄峙雲衢  
未有紀述何以為壽無盡藏之傳至元丁丑秋懇輦真  
國師以其事請于朝制可命奉御脫烈傳旨翰林院定

撰合立碑文者臣謹按提點僧崇湛具列事蹟寺舊有塔曰圓照癸酉之兵燼焉逮國朝辛卯萬安恩公來主函丈始圖興復其感驗靈異有神化無方者初公既祝髮心印佛乘機蟠利用鍊形辟穀面壁安禪結習於臨城者五年建緣於清泉者有日演法出無礙妙辯濟物現當機應身至回邪入正卻火返風雞悟靈而啄香牛馴致而受戒寒泉復沓井之波斗粟周衆僧之供復以慈菩根力愈竒疾拯危厄人藏髮餘珠垂舍利潔庖寮

而侍館穀代公私而息繹駮其感化方便人叵具舉第  
以菩薩目之以致遠邇隆嚮願言皈依及廟後興得能  
仁觀音舍利三顆尤大殊常又易塔心柱礎因風自正  
故勲貴豪富鉅商世農施獻輸給同竟事緣金幣梓材  
不期而輦至藝巧工能不率而子來風動雲委畧無虛  
日不十稔叠構重簷輪奐離立文階層祀勢軋坤軸藻  
拱璇題暈飛塵外若乃紺瓦鱗差金輪眩彩覆法雲於  
真境曜慧景於康莊絢爛動盪若金光明中現無量化

佛即之者火宅晨涼即之者重昏夜曉誠法界之寶宮  
河朔之傑觀也實經始於重光單闕之仲春斷手於上  
章因敦之秋孟簷十有三崇六十仞其工與費不可殫  
紀癸卯冬師拂衣禪室歸寂真空即日有雨水花之異  
塔位石像亦怛化流潤若潛馬出涕者及斂大衆聞空  
中來妙音樂聲雲光變幻環剎成五色樓觀中現三大  
士像至有升塔投空攀號者其具戒門資萬數內嗣祖  
傳法解三藏教沙門今亦千計其為世宗師感慕者蓋



如此已酉歲嗣僧崇朗因太保劉秉忠奏疏請聖上為  
大功德主遂嘉納焉且聞師梵行清修乃遣近侍護葬  
及建塔賜銘謚曰弘慈博化大士勅寺額曰大開元寺  
塔曰晉門之塔爾後累降綸恩優護瞻卹靡不備至其  
紹化住持曰崇潤嗣傳住持曰崇朗崇悟崇瑀至崇嚴  
凡六代初緣清泉淨土寺乃大士宗姪崇音住持云臣  
竊聞大雄氏之教以清淨虛寂為心方便慈悲為用愍  
念大千衆生墮落苦海洪濤鼓風飄流無際世尊心運

慈航拯溺度厄俾登彼岸歸淨土正路又慮一切愛慾  
有迷悶終不覺其本來真心者故假像設教閱厯靈效  
至理絕人區事出天外弗爾奚能傳悠久而警悟萬億  
劫邪窄堵波之建假教高顯極矣然道自人弘功繇緣  
立非遇間氣傑出智慧開濟大士疇克弘通法海鋪敷  
教基如是光大者哉宜為聖天子終始崇奉如一特詔  
賜銘以昭永世臣某拜手稽首而獻銘曰

釋迦挺生自西域

靈山玄風暢無極

經從白馬肆金光

法本誠心歸利益

仁皇應世憫言湮

大千淪流苦海厄

教因象設濟無邊

塔廟龍宮爭湧出

開元大士弘慈公

五載雷轟奮禪窟

法音演出琉璃筒

建此道場化所服

高標突地跨蒼穹

一日雄尊三百尺

雨華大風韻流鈴

師雖示寂此長舌

聖皇錫號曰晉門

臣今思議何惻怛

要欲手挈閻浮生


躋彼仁壽極樂國

臣聞大德必得壽

佛應回施無量福

蘿圖鞏固等彌盧

聖子神孫千萬億



秋澗集卷六十七